



**JUDICIAL SYSTEM MONITORING PROGRAMME**

**PROGRAMA MONITORIZASAUN SISTEMA JUDISIAL**

### ***Komunikadu Imprensa***

***12 Agostu 2013***

## **JSMP Realiza Treinamentu kona-ba Demokrasia no Papel Órgaun Soberanu ba Komunitade Betanu iha Distritu Manufahi**

Iha 8 Agostu 2013, Programa Monitorizasaun ba Sistema Judisiál (JSMP) liuhosi unidade POP hala'ó treinamentu ba comunidade Suku Betano, Sub-Distritu Same, Distritu Manufahi. Treinamentu ne'e kobre asuntu sira kona-ba demokrasia no kna'ar órgaun soberanu sira nian.

Partisipante hamutuk nain 30 ne'ebé konstitui hosi fetu na'in 15 no mane na'in 15. Partisipantes sira ne'e ho kapasidade hanesan vise xefe suku no estrutura suku, representante OPMT, joventude fetu no mane inklui membru comunidade sira balun.

“Liu hosi treinamentu ne'e bele hasa'e no hakle'an tan koñesimentu comunidade sira nian kona-ba demokrasia no kna'ar órgaun soberanu sira idak-idak nian atu nune'e sira bele hatene oinsa bele kanaliza sira nia preokupasaun, interese, hanoin nomós problema ruma ne'ebé mosu iha sira nia comunidade bainhira presiza”, dehan Diretór Ezekutivu JSMP, Luis de Oliveira Sampaio.

Lia-na'in suku nian, José da Conceção ne'ebé representa Xefe Suku hodi loke treinamentu ne'e agradese tebes ba JSMP tanba bele hili sira nia suku hodi hala'o treinamentu ne'e. Nia husu ba partisipante sira atu bele rona diadiak saida mak treinadór sira hato'o atu nune'e bele kumpriende materia ne'e no mós bele habelar tan informasaun ne'e ba membru comunidade sira ne'ebé la partisipa.

Partisipante sira antusiasmu no senti interese tebes ho materia ne'e no husu atu JSMP bele kontinua hala'o treinamentu ne'e ba suku seluk iha futuru.

Iha sesaun ikus, bainhira taka treinamentu ne'e, vise xefe suku Betano nian agradese JSMP tanba hakat hosi distánsia ne'ebé dok hodi ba fó treinamentu iha sira nia suku. Nia husu atu partisipante bele hatutun koñesimentu ne'ebé sira hetan liuhosi treinamentu ne'e ba membru comunidade sira seluk, inklui manuál sira ne'ebé distribui ona ba sira.

Antes remata, JSMP distribui mós manuál treinamentu hamutuk 230 ba partisipante sira hotu hodi fahe mós ba comunidade sira.

Atu hetan informasaun kle'an favor kontaktu direktamente:

Luis de Oliveira Sampaio  
Executive Director of JSMP  
Email:[luis@jsmp.minihub.org](mailto:luis@jsmp.minihub.org)  
[info@jsmp.minihub.org](mailto:info@jsmp.minihub.org)

Landline: 3323883 | 77295795

Twitter: @JSMPTl

Facebook: [www.facebook.com/timorleste.jsmp](http://www.facebook.com/timorleste.jsmp)